

Regional News Unit AIR Aizawl
Thursday, September 12, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Revenue Minister Pu B. Lalchhanzova chuan tunlaia zanlama hnathawka tul, Directorate of Land Revenue & Settlement leh Settlement Officer (Aizawl) office te nizan khan a tlawh.
- Bairabi atanga Kolasib panna Bairabi - Zero Point inkar NH-164 (New NH-6) a Kawng chhia leh khuar siam that dan tur sawiho a ni.
- Union Cabinet chuan kum 70 chunglam tan sum lakluh zat bithliah awmlova a a thlawna damlo enkawlina scheme Ayushman Bharat PM Jan Arogya Yojana a pawm.
- Prime Minister Narendra Modia chuan India chu semiconductor siamchhuahna industry hmasawn zelnaah dinhmun pawimawh tak a luah dawn a ni a ti.

<><><>

REVENUE MINISTER VISIT

Land Revenue & Settlement Minister Pu B. Lalchhanzova chuan Directorate of Land Revenue & Settlement leh Settlement Officer (Aizawl) office te chu nizan khan a tlawh.

Aizawl Revenue District hmun hnih : Aizawl South leh Aizawl North a then tura July ni 25 a order chhuak tawh bawhzuiin LR&S department a thawktute hi August ni 12 atang khan zan lamah overtime in an thawk thin a. Aizawl-ah Settlement Office pahnih a awm tawh dawn avanga Land record leh a kaihnawih hrang hrang te chin fel leh thliar hna hi zan lamah leh pisa chawlhah te an thawk thin a ni. General register tun hmaa a kum bi a vawn thin chu Veng leh Khua a thliar vek a tul tak avangin department a thawktute hian rim takin an buaipui mek a ni.

Minister Pu B Lalchhanzova chuan thawktute thawhrimna leh thahnemngaihna chu chhuanawm a tih thu sawiin chhun lamah nilenga mipui nen an indawr tawh hnua zan lam leh Irinni bakah pisa chawlhah te rim taka sawrkar ruahmanna ti hlawhtling tura hma an lakna ah LR&S department-a officer leh staff te inpekna chu ropui a tih thu a sawi. Minister hian Land record leh land administration ah Central sawrkar leh state upa zawk ten technology thar nena hma thui tak an lak tawh chu umphak tumin theihtawp chhuah a tul thu sawiin SASCI hnuaia tih tur min bituk te chu hun tlem te chhunga tih zawh ngai a ni a, chumi ti thei tur chuan department a thawk zawng zawng te chu team khat an nih inhre reng chungin tangrual turin a chah a ni.

Minister tawiaawmtu Revenue Secy Pu Vanlalmawia pawn thawktute inpekna chu ropui a tih thu sawiin, department kalphung leh hna kalpui danah mipuite tana samkhai tur zawng zel chung a inher rem chhoh zel a pawimawh thu a sawi a. LR&S department chu UT hunlai atang tawha awm tawh department hnuhma nei thui tak leh kalphung nghet tak nei a ni a, chutih rualin thil tha zawk leh tihdan thar bakah thiamna thar hmanga inthum chak zel a tul thu a sawi ve bawk.

LR&S Officer leh staff ten an record thliar leh siamfel mekte chu an kalpui dan leh an hnathawh dan te Minister hi an lo hrilhfiah a. Minister leh Secretary ten zan tlai pawh sawi lova an hnathawh a tak ngeia an rawn enpui chu office a thawkte chuan phurna nasa tak a pek thu sawiin Minister-in zanriah a buatsaih sak avanga lawmthu an sawi bawk a ni.



WEATHER ALERT

Disaster Management and Rehabilitation (DM&R) Secretary, Pi K Lalrinzuali chuan thuchhuah siamin vawiin leh naktuk September ni 13-ah Mizoram chhungah ruah nasa taka sur thei dinhmuna a din thu a sawi.

DM&R thuchhuahin a tarlan danin, Indian Meteorological Department-in thuchhuah an siamah, nimin atanga September ni 13, a bik takin vawiin leh naktuk-ah te Mizoram chhungah ruah nasa tak sur thei tura tarlan a ni.

Hemi avang DM&R department chuan leimin leh chhياتna nasa tak thleng thei lakah mipuite fimkhur theuh tura ngenin, mi tinin mahni in leh a vela tui kal dan te ennawn tur leh, leimin hlauhawm leh chhياتna lian tham thlen thei a awm a nih chuan a rang lama thuneitute hriattir vat turin mi tinte a ngen a. Ruahsur nasa avanga kawng hrang hrang a harsatna awm thei-ah sorkar department hrang hrangte pawh mahni mawhphurhna hlen theuh tura theihtawp chhuah tura a ngen thu thuchhuahah hian tarlan a ni bawk.



BAIRABI-KOLASIB ROAD

Bairabi atanga Kolasib panna Bairabi - Zero Point inkar NH-164 (New NH-6) a Kawng chhia leh khuar siam that dan tur sawiho in Kolasib DC hova din Group III member te chu nimin khan an meeting a.

Meeting hi Bairabi SDO(C) Pi Josephine Zonunsangi'n kaihruai in, SDO (C) chuan, mipui in Kawng tha an phu thu leh Kawng siam tha tura hmalak mek na ah a enkawltu PWD leh Contractor te chu theihtawp chhuah turin a hrilh a, Kawng chhia siam mek ah party politics leh in chirh thehna awm lo se a duh thu a sawi.

He hunah hian Group III member Bairabi Sub-Division PWD SDO Pu Joseph Laldintluanga chuan an hmalak dan tlangpui a tarlang a, kawng khuar leh a chhe zual lai siam nan Lung (boulder) cheng nuai 3 man an hman tawh thu leh sum lamah harsatna a awm avangin duh anga hnathawh chak a harsat thu a sawi.

Kolasib District a lirthei neitu leh Driver inzawmkhawm pawl JAC aiawhte chuan Bairabi leh Zero Point inkarah Kawng siam tha tura hmalakna a chak lo ni a an hriat thu sawiin, hemi inkarah hian Kawng khuar leh lirthei tana tlan harsa hmun 17 a awm thu an sawi a, thla kalta August ni 23 atanga chhiar a thla khatna September ni 23 ah Kawng khuar thawm tha tura Inremna chu a tawp tep tawh avangin Contractor leh department te chu hun tiam chhunga thawk zo ngei turin an phut thu an sawi.

Meeting zawh hian member te chuan an Chairman Pi Josephine Zonunsangi hoin Bairabi leh Zero Point inkara hnathawh mek te a hmunah an en nghal a, he hunah hian Bairabi PWD SDO Pu Joseph Laldintluanga, Contractor Amit Prasad (NIDHI Creative Infrastructure Pvt Ltd), Kolasib District MJA President Pu Andrew Vanlalauva, JAC Chairman Pu C. Thanhlira leh OB dangte leh mi pawimawh thahnem tak an tel ani.

Contractor NIDHI Creative Infrastructure Pvt Ltd hian Bairabi Lui (Zophai) atanga Pangbalkawn bul Sihdarh peng (89KMP leh 105KMP) inkar an thawk mek a, hna hi nikum September atanga tan in, Agreement ang chuan kumthar March ni 4, 2025 ah thawk zo tur a tih anni. Sihdarh peng leh Zero Point inkar hnathawk tur zawna Tender chhuah anih thu meeting ah hian tarlan ani bawk.

<><><>

UNLAWFUL ACTIVITIES

Unlawful Activities (Prevention) Tribunal, New Delhi chuan Sikhs for Justice (SFJ) pawl chu dan kalha pawl din a ni a ti a, Unlawful Activities (Prevention) Act, 1967 hnuaiah kum 5 chung chu dan pawnah hnawl a nih thu a puang.

<><><>

LMC

Mizoram Sawrkara Health & Family Welfare Minister Pi Lalrinpui chuan Lunglei Municipal Council (LMC) hmunpui a tlawh a, Board of Council Hall, Convention Centre-ah councillor-te nen an inkawm.

Health Minister Pi Lalrinpui hi Lunglei South bialtu MLA Pu Lalramliana leh Lunglei West bialtu MLA Pu T. Lalhlimpaia te'n an tawiawm a. LMC Chairman Pu Lalzuithanga hovin LMC councillor-te'n lo dawngsawngin, LMC hma lakna hrang hrang an lo sawipui bakah, harsatna leh mamawh an neihte a hnenah hian an lo thlen a ni.

He hunah hian LMC hma lakna thlir ho a nih bakah, hmabak leh hmachhawp awmte tihlawhtlin a nih theih nana hma lak dan tur leh LMC hma lakna atana thil pawimawh hrang hrangte sawi ho a ni bawk.

<><><>

AB PMJAY ABOVE 70 YEARS

Union Cabinet chuan kum 70 chunglam tan sum lakluh zat bithliah awmlova a a thlawna damlo enkawlina scheme Ayushman Bharat PM Jan Arogya Yojana a pawm. Union Minister Ashwini Vaishnaw chuan hemi chungchang hi Delhi-a chanchinbumite a kawmnaah he thu hi sawiin sawrkarin thutlukna pawimawh tak a siam a ti a. Kum upa te chuan damlo nikhuaa inenkawlina cheng nuai 5 thleng kum khatah an dawng thei dawn a ti a. He scheme hian chungkaw vaibelchhe 4.5 a tuam a, kum upa mi vaibelchhe 6 chuangin an chhawr thei dawn a ni.

He scheme hmang thei turte chu AB PM-JAY hnuaiah card thar pekchhuah a ni dawn a. Tuna AB PMJAY hmang mek chungkaw zinga kum 70 chunglam awmte chu a belhchhah nan cheng nuai 5 hi pek belh leh a ni ang.

<><><>

PM SEMICON

Prime Minister Narendra Modia chuan India chu semiconductor siamchhuahna industry hmasawn zelnaah dinmun pawimawh tak a luah dawn a ni a ti. Nimina SEMICON India, Greater Noida-a a hawnnaah Prime Minister Narendra Modia chuan he thu hi sawiin tunlai hunah chuan silicon indawrna hi a pawimawh tawh a, hei vang hian India pawh semiconductor siamchhuahna hmunpui ni turin a inbuatsaih mek a ti a.

Ramchhunga electronics leh semiconductor industry ti lian tura sawrkar hmalakna hrang hrang a tarlang a. Tun atanga kum 10 a liam chuan electronic bikah dollar tluklehdingawn 500 hu industry ramchhungah din a ni tawh ang a ti a. Hei hian hna thar nuai 60 chuang a siam dawn a ni a ti bawk.

Pu Modia chuan Digital India hmalakna taarlangin ramin a rah tam tak a tel mek a ti a. Tunhma chuan mobile phone hi ram pawn atanga lakluh a ni thin a, tunah erawh India hi khawvela mobile phone siam chhuak hnem ber dawttu a ni tawh a ti bawk.

SEMICON India 2024 ah hian khawvel ram hruaitute, company leh smiconductor lama mithiam tak tak an lo kalkhawm a. Exhibitor 250 leh thusawitu mi 150 chuang an awm dawn a ni.



J&K

Jammu and Kashmir-a Kahtua district-ah sipaiten firfiak pahnih an kaphlum. Rising Star Corps Army te sawidanin Udhampur leh Kathua district inrinaa Basantgarh ah sipaite leh firfiakte hi an inkap a. Helai chhehvelah hian firfiak an awm tih sipaite hian an dawn bawhzuiin dapchhuah beihpui thlak nghal a ni a. Firfiakte nen hian inkap zuiin a hmunah mi pahnih kahhlum an ni..

